



Aðalfundur íþróttafélagsins Vestra fyrir árið 2025

Haldinn miðvikudaginn 29. apríl 2026 í Vallarhúsinu, Torfnesi og hófst kl. 18.00. Á dagskrá fundarins voru hefðbundin aðalfundarstörf samkvæmt lögum félagsins.

- 1. Fundarsetning.** Guðfinna Hreiðarsdóttir, formaður, setti fundinn og bauð fundarmenn velkomna.
- 2. Kosning fundarstjóra og fundarritara:** Guðfinna lagði til að Guðný Stefanía Stefánssdóttir yrði kjörin fundarstjóri og Hlynur Reynisson fundarritari. Það var samþykkt. Guðný Stefanía tók við fundarstjórn og sagðist telja að löglega hefði verið boðað til fundarins og bar undir fundargesti hvort gerð væri athugasemd við boðun fundarins en fundurinn var boðaður á heimasíðu Vestra, www.vestri.is og facebook-síðum félagsins.
- 3. Fundargerð síðasta aðalfundar lögð fram.** Fundargerð síðasta aðalfundar er að finna á heimasíðu félagsins, www.vestri.is. Engar fyrirspurnir eða athugasemdir.
- 4. Formaður félagsins gerir grein fyrir starfsemi aðalstjórnar á starfsárinu 2025:**

STARFSSKÝRSLA FORMANNS AÐALSTJÓRNAR VESTRA 2024

KÆRA VESTRAFÓLK

Síðasti aðalfundur félagsins var haldinn 28. apríl 2025. Á þeim fundi urðu þær breytingar á stjórn að Heiðrún Tryggvadóttir fór úr stjórn og var Þorsteinn Másson kjörinn í hennar stað. Aðrir stjórnarmenn gáfu kost á sér áfram og engin önnur framboð bárust. Aðalstjórn fundaði tvisvar á árinu auk þess sem haldnir voru tveir formannafundur. Þar fyrir utan eru samskipti á Facebook-síðu aðalstjórnar þar sem ýmis tilfallandi mál eru tekin fyrir. Á Facebook er einnig síðan Vestri-Samráðsvettvangur sem stjórnar- og trúnaðarmenn deilda félagsins hafa aðgang að. Þar eru sett inn erindi sem berast frá Ísafjarðarbæ, HSV, ÍSÍ, UMFÍ og fleiri aðilum. Aðalstjórn átti fulltrúa á samráðsfundum íþróttahreyfingarinnar og Ísafjarðarbæjar og formannafundum HSV. Vestri átti níu þingfulltrúa á héraðsþingi HSV og mættu allir fulltrúar á þingið sem haldið var á Suðureyri 22. maí 2025.

Óformlegir fundir með ýmsum aðilum voru allnokkrir og má þar sérstaklega nefna Frú Höllu Tómasdóttur, forseta Íslands, sem heimsótti knattspyrnudeild Vestra á Kerecivöllinn 6. september til að óska félaginu til hamingju með glæsilegan og sögulegan árangur í bikarkeppni KSÍ. Var forsetanum afhent árituð keppnistreyja félagsins sem hún bar síðan megnið af deginum, m.a. þegar hún setti stórsýninguna Gullkistan Vestfirðir í íþróttahúsinu á Torfnesi.

Í tilefni þess að íþróttafélagið Vestri fagnaði 10 ára afmæli 16. janúar var haldinn sérstakur afmælisfundur aðalstjórnar með stjórnnum deilda félagsins. Á fundinum var Hjalti Karlsson útnefndur heiðurfélagi Vestra en Hjalti var fyrsti formaður félagsins og leiddi starfshóp sem undirbjó stofnun þess. Hjalti hefur alla tíð verið öflugur liðsmaður íþróttahreyfingarinnar á svæðinu og var einstaklega ánægjulegt að fá tækifæri til að heiðra hann á þessum tímamótum í sögu félagsins.

STARFSEMI FÉLAGSINS

Öflug og metnaðarfull starfsemi hefur verið hjá öllum deildum félagsins og árangur eftir því í keppnum á landsvísu. Vestri átti iðkendur í yngri landsliðum og úrtakshópum, sem er alltaf góður mælikvarði á gæði

Þess starfs sem deildirnar bjóða upp á. Það eru líka ákveðin gæði að vera með meistaraflokka karla og kvenna í öllum boltaíþróttum innan félagsins. Óháð því hvernig gengur þá hafa meistaraflokkar, á svo margvíslegan hátt, mikilvægu hlutverki að gegna í uppeldi yngri iðkenda. Nokkrir bikarmeistaratitlar skiluðu sér í hús og má þar fyrst nefna hjólreiðafólkið Ísar Loga Ágústsson og Söru Matthildi Ívarsdóttur sem urðu bikarmeistarar í sínum aldursflokkum, U20 karla í blaki landaði bikarmeistaratitli og síðast en ekki síst þá náði meistaraflokkur karla í knattspyrnu þeim sögulega árangri að hampa bikarmeistaratitli eftir sigur á Val í úrslitum Mjólkurbikarsins á Laugardalsvelli. Með sigrinum tryggði liðið sér þátttökurétt í forkeppni Evrópu deildarinnar á komandi tímabili.

Íþróttamaður Ísafjarðarbæjar 2025 kom frá Vestra, knattspyrnumaðurinn Fatai Gbadamosi sem gegndi lykilhlutverki í liði Vestra á síðasta keppnistímabili þegar það varð bikarmeistari. Efnilegustu íþróttamenn ársins voru valin þau Haukur Fjölnisson hjá körfuknattleiksdeild Vestra og Freyja Rún Atladóttir hjá knattspyrnudeild Vestra.

Þau ánægjulegu tíðindi urðu fyrir á þessu ári að sunddeildin var endurvakin eftir áralangan dvala. Búið er að halda aðalfund og skipa nýja stjórn fyrir deildina sem í sitja Páll Janus Þórðarson formaður, Svala Sif Sigurgeirsdóttir og Ingibjörg Kristjánsdóttir. Varamenn eru Sif Huld Albertsdóttir og Birgir Þór Halldórsson. Byrjað verður með æfingar fyrir yngstu aldurshópana og stefnan að bjóða upp á æfingar og námskeið fyrir aðra aldurshópa þegar fram í sækir.

Eftir því sem starfsemi Vestra eflist fjölgar beiðnum um nýjar íþróttagreinar innan félagsins. Höfum við almennt verið jákvæð fyrir því að stækka félagið en það er alltaf aðalfundur sem tekur ákvörðun um stofnun nýrrar deildar. Nokkrar íþróttagreinar banka á dyrnar að þessu sinni og verður lögð fram tillaga um stofnun nýrrar deildar hér á eftir, aksturíþróttadeild. Rafíþróttir eru einnig ný grein innan Vestra og fellur sú starfsemi undir almenningsíþróttadeildina enn sem komið er.

Gerð er grein fyrir starfi deilda í ársskýrslum þeirra fyrir árið 2025 á öðrum stað í þessari samantekt.

REKSTUR OG FJÁRHAGUR

Heilt yfir er fjárhagur félagsins nokkuð góður þrátt fyrir 18 m.kr. tap árið 2025. Veltan er nálægt 350 m.kr., þar af eru laun- og verktakagreiðslur 200 m.kr. og ferðakostnaður 64 m.kr. Knattspyrnudeildin er langstærst með veltu upp á tæpar 300 m.kr. eða um 85% af heildarveltu félagsins. Að fjármagna rekstur íþróttafélaga er eilíf áskorun, það léttir róðurinn ef ástand efnahagsmála og atvinnulífs er gott en þyngir hann að sama skapi í niðursveifu. Blákaldur veruleikinn er sá að það eru fyrirtækin sem halda lífinu í íþróttafélögunum og ef vel gengur hjá þeim, þá njóta félögin góðs af því.

Rekstrarreikningur aðalstjórnar er að þessu sinni réttu megin við núllið eftir nokkur ár í mínus. Skýringin er því miður ekki auknar tekjur heldur hefur sú breyting orðið að bókhaldskostnaður færirst nú á deildirnar sjálfar. Til að bregðast við mikilli hækkun bókhaldskostnaðar var keyptur aðgangur að DK-bókhaldskerfinu og gjaldkerar deilda færa nú sjálfir bókhald. Ef kaupa þarf vinnu vegna bókhalds þá greiðist það af viðkomandi deild.

Ekki er hægt að tala um fjárhag og rekstur félagsins án þess að nefna ríkisskattstjóra og skattamál íþróttafélaga. Síðasta haust barst erindi frá ríkisskattstjóra þar sem ítrekuð var skylda íþróttafélaga til að standa skil á staðgreiðslu og tryggingagjaldi til íþróttamanna og þjálfara. Ennfremur var óskað eftir upplýsingum um greiðslur og hlunnindi íþróttamanna og þjálfara hjá félögum sem eiga lið í efstu deildum tiltekinna boltaíþróttar. Olli þetta nokkrum óróleika innan íþróttahreyfingarinnar og var í kjölfarið var skipaður starfshópur til að vinna greiningu á helstu reglum sem gilda um skattaleg réttindi og skyldur þeirra aðila sem hafa með höndum íþróttastarfsemi á Íslandi. Miðað var við að hópurinn skilaði af sér greiningu og eftir atvikum tillögum eigi síðar en 30. apríl 2026. Binda menn vonir við niðurstöðu sem tryggir að íþróttahreyfingin búi við skýra, einfalda og sanngjarna skattlagningu.

ÝMIS VERKEFNI

Special Olympics-verkefni körfuknattleiksdeildarinnar fór af stað í síðasta starfsári og með góðum stuðningi var hægt að halda því áfram síðasta haust. Um er að ræða körfuboltaæfingar fyrir börn á aldrinum 6–16 ára og eru æfingarnar liður í verkefninu *Allir með*, sem er samstarfsverkefni ÍSÍ, UMFÍ og ÍF

(Íþróttasamband fatlaðra). Þar er horft til barna sem t.d. þurfa meiri stuðning, hentar betur að vera í minni hópum og hafa aðgengi að fleiri þjálfurum á æfingum. Körfuknattleiksdeildin fékk styrk úr Hvatasjóði til þess að fjármagna verkefnið auk þess sem Kvenfélagið Hvöt styrkti verkefnið og gerðist hollvinur þess. Mikill vilji er fyrir því að halda áfram með æfingar fyrir þennan hóp og vonandi munu fleiri deildir koma að því í framtíðinni.

Hreyfing & fjör er verkefni sem félagið fór af stað með í vetur og er ætlað krökkum í 5. til 10. bekk. Verkefnið, sem er styrkt af Íþróttasjóð Rannís og Hvatasjóði UMFÍ, miðar að því að skapa vettvang fyrir börn sem ekki finna sig í hefðbundnu íþróttastarfi og börn sem vilja iðka íþróttir á eigin forsendum án áherslu á keppni eða afreksmiðaðra þjálfun. Lögð er áhersla á fjölbreytta hreyfingu, leikgleði, félagslega þátttöku og jákvæða upplifun af íþróttum. Á æfingum er einnig unnið með gildi Vestra sem eru virðing, metnaður og gleði og börn frædd um mikilvægi félagslegrar samveru, þátttöku í hópefli og grunnstoðum almennrar lýðheilsu. Þjálfari er Árni Heiðar Ívarsson og eru æfingarnar gjaldfrjálssar.

Vestralagið. Í tilefni þess að íþróttafélagið Vestri fagnaði 10 ára afmæli 16. janúar var farið í útgáfu á sérstöku Vestralagi. Einvalalið tónlistarmanna kom að gerð lagsins og má þar fyrst nefna Þormóð Eiríksson sem samdi lagið ásamt Ásgeiri Kristjáni Karlssyni og unnu þeir saman að hljóðblöndun, útsetningu og pródúseringu. Kristján Sturla Bjarnason lagði þeim lið með lúðra, trombone og horn. Flytjandi lagsins er Elvar Orri Palash Arnarsson sem einnig samdi lagatexta ásamt Ásgeiri Kristjáni. Gunnar Dagur hannaði kápu fyrir lagið sem hefur verið aðgengilegt á Spotify frá því í febrúar og er núna komið í um 10.300 spilarnir. Ýmis fyrirtæki og einstaklingar styrktu þetta verkefni og fá kærar þakkir fyrir stuðninginn.

SAMSTARF VIÐ SVEITARFÉLÖG

Eðli málsins samkvæmt þurfa íþróttafélög að hafa alls konar samskipti við sveitarfélög á sínu starfssvæði. Það er allra hagur að þau samskipti séu góð og vill íþróttafélagið Vestri færa Ísafjarðarbæ, Bolungarvíkurkaupstað og Súðavíkurhreppi þakkir fyrir gott samstarf og velvild í garð félagsins.

Samráðsfundir. Árið 2024 tók Ísafjarðarbær upp þá nýbreytni að halda samráðsfundi íþróttahreyfingarinnar og sveitarfélagsins. Markmið þessara funda var að auka gagnsæi og stytta boðleiðir í stjórnáráttum jafnframt því að vera vettvangur þar sem íþróttafélögin geta komið sínum málum á framfæri. Í ársskýrslu síðasta árs kom fram átta fundir höfðu verið haldnir og ánægja með þetta fyrirkomulag sem þótti almennt skila bættum samskiptum og samstarfi við íþróttafélögin. Því miður hefur ekki orðið framhald á þessum fundum og hvetur aðalstjórn Vestra forsvarsmenn íþróttamála hjá sveitarfélaginu til að taka upp þráðinn að nýju þar sem samtalið er grundvallaratriði í uppbyggingu íþróttastarfs á svæðinu.

Frístundastyrkur. Vestri lýsir ánægju með þá ákvörðun bæjarstjórnar Ísafjarðarbæjar að breyta reglum um frístundastyrki þannig að aldursviðmiðið breyttist úr 5.-10. bekk grunnskóla í 1.-10. bekk grunnskóla. Ennfremur að hækka heildarfjárhæð frístundastyrkja úr 10 m.kr. í 15 m.kr. Eru þetta mikilvæg skref í þá átt að styðja börn til þátttöku í uppbyggilegu frístundastarfi óháð efnahag efnahag og frekari skref í þá átt væri að hækka aldursviðmiðið þannig öll börn á aldrinum 6–18 ára ættu rétt á frístundastyrk. Frístundaráttan gegnir sömuleiðis lykilhlutverki hvað varðar þátttöku barna í skipulögðu íþróttastarfi og er Samstarf Ísafjarðarbæjar og Bolungarvíkurkaupstaðar um þetta verkefni til fyrirmyndar og ber að þakka.

Á síðustu árum hefur mikið verið rætt um það innan íþróttahreyfingarinnar hvernig auka megi þátttöku barna og ungmenna af erlendum uppruna í skipulögðu íþróttastarfi. Tvö atriði vega þungt, annars vegar kostnaður og hins vegar aðgengi að upplýsingum. Fyrir þennan hóp og barnafjölskyldur almennt skiptir frístundastyrkurinn miklu máli. Fyrir þennan hóp skiptir líka máli að vita af þessum stuðningi og geta sótt sér upplýsingar um starfsemi íþróttafélaga á einfaldan hátt. Við, Vestrafólk, berum mikla ábyrgð gagnvart þessum hópi. Það á að vera markmið okkar að upplýsingar um starfsemi félagsins og þá þjónustu sem börnum og ungmennum stendur til boða séu aðgengilegar öllum. Samfélagsmiðlar eru ágæt leið til að miðla upplýsingum en vefsíða félagsins er sá staður þar sem fólk leitar eftir t.d. æfingatöflum og upplýsingum um æfingagjöld. Þar þurfum við að vanda okkur og gæta þess að upplýsingar séu réttar og uppfærðar reglulega.

Ferðakostnaður. Aðalstjórn lýsir yfir ánægju með bókun bæjarstjórn Ísafjarðarbæjar nú nýverið þar sem tekið er undir áskorun Knattspyrnusamband Íslands á yfirvöld íþróttamála, sveitarfélög, ÍSí og UMFÍ um að taka höndum saman um markvissar aðgerðir til að jafna augljósan aðstöðumun íþróttafólks á landsbyggðinni með því að mæta þeim ferðakostnaði sem íþróttafélög og foreldrar á landsbyggðinni glíma við. Bæjarstjórn segir í bókun sinni að um kerfislegt misrétti sé að ræða sem sé óásættanlegt enda sé íþróttaiðkun barna ekki munaður heldur grundvallarþáttur í lýðheilsu, félagslegri þátttöku og uppbyggingu samfélaga. Þegar fjölskyldur standa frammi fyrir milljónakostnaði vegna þátttöku barna sinna er ljóst að jafnræði er ekki til staðar og ekki sé ásættanlegt að búseta barna á Íslandi ráði því hvort þau geti tekið þátt í íþróttum.

Hár ferðakostnaður hefur lengi verið áhyggjuefni þeirra sem reka íþróttafélög á landsbyggðinni og verður sífellt þyngrli liður í rekstrinum. Ferðakostnaður Vestra árið 2025 er 64,2 m.kr, ferðastyrkir eru 9,7 m.kr. Í Ferðasjóði íþróttafélaga fyrir árið 2025 voru 123,9 m.kr. en styrkhæfar umsóknir námu 694,6 m.kr. Það má árétta að umsækjendur skrá einungis beinan ferðakostnað, ekki gistingu sem kostar sitt. Miðað við þessar tölur eru íþróttafélögin að fá styrk fyrir um 18% af ferðakostnaði, fjáraflanir þarf til að dekkja mismuninn sem er í raun er mun meiri þegar kostnaður við gistingu er tekinn með í reikninginn. Þrátt fyrir fjáraflanir þá er það staðreynd að foreldrar sitja uppi með talsverðan kostnað vegna þátttöku barna sinna í keppnisferðum. Það geta ekki allir foreldrar staðið undir slíkum útgjöldum þannig að það geta ekki *Allir verið með*, sem er í hrópandi andstöðu við allar opinberar stefnur í íþróttastarfi á Íslandi. Austfirðingar hafa komið fram með hugmynd um Loftbrú fyrir íþróttafélög og settu það m.a. sem markmið í Sóknaráætlun Austurlands 2025–2029 að íþróttafélög og skipuleggjendur listviðburða geti nýtt Loftbrú til að lækka kostnað við keppnisferðir og viðburðahald. Austfirðingar búa við talvert betri flugþjónustu en Vestfirðingar, þar eru 2-4 ferðir daglega þannig að eðlilega vilja Austfirðingar nýta þann ferðamáta eins og kostur er. Árið 2025 fóru 90 þús. farþegar um Egilstaðaflugvöll en 28 þús. um Ísafjarðarflugvöll. Flugíð hér fyrir vestan er of strjált og óáreiðanlegt til að vera valkostur þannig að við, og stór hluti íþróttaliða á landsbyggðinni, sitjum uppi með landleiðina og tímafrek ferðalög. Við þurfum gott og öruggt vegakerfi og við þurfum niðurgreiðslu á aksturskostnaði og gistikostnaði. Við þurfum landbrú frekar en loftbrú. Einfaldast er að hækka framlag ríkisins í Ferðasjóðinn og gera gistikostnað styrkhæfan. Hvað sem verður, þá er ljóst að eitthvað þarf að gerast ef íþróttastarf á landsbyggðinni á að þrífast.

ÍÞRÓTTAMANNVIRKI

Vorið 2025 var byrjað á smíði 69 m² viðbyggingar ofan á suðurenda áhorendastúkunnar og þó svo að talsverð vinna sé eftir enn þá hefur hún verið í notkun frá síðasta sumri. Þarna verður veitingasala ásamt betri stofu og fullkláruð verður þessi nýja aðstaða mikil breyting til hins betra fyrir knattspyrnudeildina. Þá hafa verið ýmsar framkvæmdir í Vallarhúsinu sem miða að því að bæta aðstöðuna þar, einkum á efri hæð hússins þar sem knattspyrnudeildin hefur lagt mikla vinnu í að útbúa almennilega félagsaðstöðu og vinnurými. Uppsetning á eldhúsi og salerni er langt komin, framkvæmd sem lengi hefur verið beðið eftir. Á þessu ári er gert ráð fyrir lýsingu og hita á Kerccis-völlinn sem þýðir að hægt verður að nýta hann meira.

Umfjöllun um íþróttamannvirki, uppbyggingu og viðhald er fastur liður í ársskýrslu félagsins og þrátt fyrir að þessi mál þokist í rétta átt þá stöndum við frammi fyrir verkefnum sem eru áskoranir fyrir bæði íþróttahreyfinguna og sveitarfélagið sökum stærðar og kostnaðar. Mikilvægi uppbyggingar hefur hins vegar aldrei verið meiri og þörfin knýjandi í vaxandi samfélagi þar sem íbúar gera kröfur um sömu þjónustu og íbúar annarra sveitarfélaga njóta. Íþróttahúsið á Torfnesi er löngu sprungið og annar engan veginn eftirspurn íþróttafélaga eftir tímum. Hefur þetta ástand leitt til kergju í samskiptum annars vegar íþróttafélaga og bæjaryfirvalda og hins vegar innan íþróttafélaganna sjálfra. Með áframhaldandi fjölgun íbúa á svæðinu mun staðan aðeins versna ef ekkert verður að gert. Við höfum oftast en einu sinni talað um að vera samkeppnishæf þegar kemur að vali á búsetu og þar er öflugt íþrótt- og tómsundastarf lykilatriði. Skipulagsmál Torfnessvæðisins, eða frekar óskipulagsmál Torfnessvæðisins, hafa þvælst fyrir okkur of lengi. Rætt hefur verið um yfirbyggt knatthús frá a.m.k. 2013 og samhliða nauðsyn þess að klára skipulag fyrir Torfnessvæðið. Hvernig má það vera að öllum þessum árum seinna erum við enn á sama stað, sem sagt engum stað, þegar allir vita hvað þarf? Það verður engin uppbygging á Torfnesi fyrr en skipulag fyrir svæðið hefur verið afgreitt. Komum okkur út út þessari þöku og klárum málið. Leiðarljósið er öll íþróttaaðstaða á sama svæði, þannig nýtast mannvirki og starfsfólk best, þannig tryggjum við auðvelt

aðgengi að íþróttastarfi. Allt sem við þurfum kemst fyrir á Torfnesi og ef við þurfum meira þá búum við til land, við erum vön því. Innan sveitarfélagsins er skilningur á mikilvægi þess að bjóða upp á góða aðstöðu og vilji til að gera betur. Uppbygging íþróttamannvirkja er sannarlega áskorun en nú þarf að panta steypubílinn og halda áfram þar sem frá var horfið árið 1993 þegar íþróttahúsið á Torfnesi var vígt.

AÐ LOKUM

Þegar Vestri fagnaði 10 ára afmæli þann 16. janúar sl. var ákveðnum áfanga náð, við stöldruðum við um stund og horfðum yfir farinn veg, en síðan einfaldlega áfram gakk því ferðlagið er rétt að byrja. Á fyrstu starfsárum félagsins var Hjalta Karlssyni formanni tamt að tala um fyrstu skref Vestra og barnsskóna sem átti eftir að slíta. Í lok annars starfsárs félagsins sagði hann í ársskýrslu stjórnar: „Ef notuð væri samlíking við kornabörn, ætti félagið á árinu að hafa lært að ganga nokkuð styrkum fótum og eflaust sæist í nokkrar tennur. Samlíkingin er kannski ekki svo vitlaus, því ný íþróttafélög þurfa að þroskast og læra nýja siði rétt eins og barnið.“

Vestri er engin smákrakki lengur, okkur hefur tekist að búa til öflugt íþróttafélag og þurfum að standa undir væntingum sem samfélagið gerir til félagsins og kröfum um fagmennsku. Við, sjálfboðaliðarnir, erum ekki að „dunda“ okkur við að reka íþróttafélag, síður en svo. Þetta er mikil vinna sem krefst tíma, atorku, þrautseigju og metnaðar. Ekkert gerist af sjálfu sér og sá sem ekki stígur fram, skilur ekki eftir sig spor.

Þetta er það sem er í Vestraveldinu.

Ég færi stjórnarfólki innan raða íþróttafélagsins Vestra þakkir fyrir gott samstarf á liðnu starfsári sem og öllum öðrum sjálfboðaliðum sem starfa í þágu félagsins. Styrktaraðilar og stuðningsmenn Vestra fá miklar þakkir fyrir að styðja við og standa með félaginu í blíðu og stríðu.

Áfram Vestri!

5. Lagður fram endurskoðaður ársreikningur félagsins. Guðni Guðnason gjaldkeri Vestra, lagði fram endurskoðaðan ársreikning sem samþykktur hefur verið af skoðunarmönnum félagsins. Hann fór yfir helstu lykiltölur í rekstri félagsins og tók þar sérstaklega fyrir viðskiptastöðu sunddeildar. Reikningarnir liggja frammi á heimasíðu félagsins.

Að lokinni yfirferð gjaldkera opnaði fundarstjóri fyrir umræður um ársskýrslu og ársreikning og bar síðan upp til atkvæðagreiðslu skýrslu formanns og ársreikning og var hvort um sig samþykkt samhljóða.

6. Ákvörðun félagsgjalds. Guðni Guðnason, gjaldkeri félagsins, bar fram tillögu um að félagsgjaldið yrði óbreytt, þ.e. 2.500 krónur. Tillagan borin upp til atkvæða og samþykkt.

7. Fjárhagsáætlun lögð fram til samþykktar. Fundarstjóri gaf Guðna Guðnasyni gjaldkera orðið. Hann fór yfir helstu tölur í fjárhagsáætlun þessa árs og fundarstjóri opnaði síðan fyrir umræður. Tillagan borin upp til atkvæða og samþykkt.

8. Lagabreytingar. Fundarstjóri upplýsti að tvær tillögur um lagabreytingar hafi borist fyrir aðalfund og myndi formaður gera grein fyrir þeim. Sagði formaður aðra tillöguna koma frá aðalstjórn þar sem lagt er til að stofnuð verði aksturíþróttadeild innan félagsins. Hin tillagan kemur einnig frá aðalstjórn og inniheldur ýmsar breytingar á lögum félagsins skv. tillmælum ÍSÍ. Formaður lagði til að fyrst yrði borin upp til laga um stofnun aksturíþróttadeildar innan félagsins. Fundarstjóri opnaði á umræður um tillöguna en enginn kvað sér hljóðs.

Fundarstjóri bar því næst upp tillögu um að aksturíþróttadeild yrði stofnuð innan íþróttafélagsins Vestra og var það samþykkt í einu hljóði.

Formaður því næst yfir þær breytingar sem ÍSÍ hefur bent á að gera þurfi á lögum félagsins:

1 grein. Viðbót: „og að stjórnir félags og deilda starfi af heilindum og viðhafi góða stjórnunarhætti.“

4 grein. Viðbót: Félagi getur hver sá einstaklingur orðið sem óskar þess og samþykkir að taka á sig þær skyldur er því fylgja.

6 grein. Breyting: „Auglýsa skal aðalfundinn opinberlega með 14 daga fyrirvara“

6 grein. Viðbót: Í aðalfundarboði skal kynna dagskrá, tillögur, fundartíma og fundarstað.

6 grein. Viðbót: Lög félagsins og breytingar á þeim þarfnast staðfestingar íþróttahéraðanna HSV og HSV og framkvæmdarstjórnar ÍSí.

9 grein. Viðbót: Allir skuldlausir félagsmenn 18 ára og eldri hafa kjörgengi til stjórnarstarfa og atkvæðisrétt á aðalfundi hafa allir skuldlausir félagsmenn 16 ára og eldri.

14 grein. Viðbót: Einungis er keppt í viðurkenndum greinum samþykktra deilda og tilkynnir félagið til viðkomandi sambandsaðila þegar ný íþrótt er iðkuð innan félagsins og hvort stofnuð er um hana sérstök deild. Hafi hin nýja íþrótt ekki verið iðkuð hjá íþróttafélagi innan ÍSí skal félagið óska eftir tilvísun frá íþróttahéraði á málinu til framkvæmdarstjórnar ÍSí til úrskurðar um uppfyllt skilyrði til aðildar.

Eignir hvernar deildar [...].

Hver deild tryggir að ekki sé ráðinn til starfa einstaklingur til að sinna börnum eða ungmennum undir 18 ára aldri sem hlotið hefur refsisdóm vegna brota á ákvæðum XXII. kafla, 211. eða 218. gr. almennra hegningarlaga, nr. 19/1940. Sama gildir um þá sem hlotið hafa refsisdóm fyrir brot gegn lögum um ávana- og fíkniefni, nr. 65/1974, á síðastliðnum fimm árum. Ákvæði þetta nær einnig til þeirra sem er falin umsjón með börnum og ungmennum undir 18 ára aldri á grundvelli sjálfbóðaliðastarfs, sbr. lög nr. 64/1998. Í því skyni að uppfylla ákvæði þetta skal aflað sakarvottorðs einstaklinga sem til stendur að ráða eða njóta aðstoðar á grundvelli sjálfbóðaliðastarfs.

24 grein. Viðbót: Lög þessi öðluðust gildi á stofndegri félagsins 16 janúar 2016 en voru yfirfarin og uppfærð í núverandi mynd á aðalfundi 30. apríl 2019 og aðalfundi 29. apríl 2026.

Fundarstjóri lagði til að allar framlagðar lagabreytingar yrðu samþykktar í einum pakka og voru fundarmenn sammála því. Bar fundarstjóri upp tillögu um breytingar á lögum félagsins og var hún samþykkt.

9. Kosningar

a. Kosinn formaður. Tillaga: Guðfinna Hreiðarsdóttir. Samþykkt með lófataki.

b. Kosnir þrír stjórnarmenn til tveggja ára. Heba Dís Prastardóttir, Hlynur Reynisson og Guðni Guðnason eru núna að ljúka tveggja ára kjörtímabili og gefa kost á sér áfram. Fyrir eru í stjórn eru Gísli Jón Hjaltason, Þorsteinn Másson og Þóra Marý Arnórsdóttir sem voru kjörin á síðasta aðalfundi til tveggja ára. Engar aðrar tillögur bornar fram, samþykkt með lófataki.

c. Kosnir tveir varamenn til eins árs. Tillögur: Marcel Knop og Marzellíus Sveinbjörnsson. Samþykkt með lófataki.

d. Kosnir tveir skoðunarmenn reikninga og einn til vara. Tillögur: Ásdís Birna Pálsdóttir, Sigrún Sigvaldadóttir og Gísli Úlfarsson til vara. Samþykkt með lófataki.

10. Önnur mál. Engin önnur mál borin upp.

11. Fundarslit. Fundarritara var falið að ganga frá fundargerð og birta á heimasíðu. Fundarstjóri gaf þá formanni, Guðfinnu Hreiðarsdóttur orðið og fól henni stjórn fundarins. Formaður þakkaði Sigurði A. Jónssyni fyrir stjórnarsetu og störf í þágu félagsins. Ennfremur bauð formaður Marcel Knop velkominn til starfa í aðalstjórn Vestra. Formaður hvatti fundarmenn til að mæta á stofnfund Aksturíþróttadeildarinn sem haldinn yrði í beinu framhaldi af aðalfundinum, þakkaði fundarstjóra og fundarritara fyrir þeirra störf og fundarmönnum fyrir komuna.

Fundi slitið kl. 19:00.